


Fyrirhuguð landfylling mun raska sjávarfitjum við enda Kveldúlfsgötu og enn fremur hafa áhrif á leirur í Borgarvogi. Eins og fram kemur í umsögn Náttúruverndar ríkisins frá 28. október 2002 er Borgarvogur á náttúruminjaskrá, sem og á skrá alþjóða fuglaverndarsamtakanna (BirdLife International) yfir fuglasvæði sem eru alþjóðlega mikilvæg. Þá eru sjávarfitjar og leirur vistkerfi sem njóta skulu sérstakrar verndar skv. 37. gr. laga nr. 44/1999 um náttúruvernd og skal forðast röskun þeirra eins og kostur er. Leirur eru mikilvægir viðkomustaðir ýmissa fuglategunda, einkum vaðfugla, andfugla og máfa, og eru leirur í Borgarvogi mikilvægar sem fæðuöflunarsvæði fyrir fugla.

Sjávarfitjar, þ.e. svæði vaxin háplöntugróðri sem fara undir sjó annað slagið, eru sjaldgæfar hérlendis. Benda má á að í bókinni *Íslensk votlendi, verndun og nýting* segir m.a. í kafla um sjávarfitjar (Agnar Ingólfsson): „*Ekki fer á milli mála að sjávarfitjar og fitjatjarnirnar sem þeim fylgja eru merk náttúruyfyrirbæri. Lífríkið er sérstætt og nokkrar tegundir dýra og plantna finnast ekki nema á fitjum.*” Umhverfisstofnun bendir á að ekki liggja fyrir rannsóknir á sjávarfitjunum við enda Kveldúlfsgötu og því ekki ljóst hver tegundafjölbreytnin er á svæðinu né hvort þar er að finna sjaldgæfar tegundir. Þá eru sjávarfitjar í Borgarvogi enn lítt kannaðar, sbr. upplýsingar í framangreindri skýrslu Líffræðistofnunar Háskólans.

Umhverfisstofnun ítrekar nauðsyn þess að farið verði varlega í allar framkvæmdir við Borgarnes sem raska sjávarfitjum og leirum, enda hafa þessi vistkerfi mikið verndargildi. Þau svæði sem enn eru eftir óröskuð hafa sífellt meira verndargildi þar sem stöðugt gengur á þessi svæði vegna ýmissa framkvæmda, s.s. landfyllinga. Að mati stofnunarinnar er eðlilegt að það svæði sem fer undir fyrirhugaða landfyllingu verði rannsakað með tillit til náttúrufars og verndargildi þess metið áður en tekin er ákvörðun um hvort ásættanlegt er að raska því. Stofnunin mælist því til þess að fyrirbyggjandi deiliskipulag verði ekki samþykkt að svo stöddu.

Virðingarfyllst,


Sigrós Friðriksdóttir


Gunnar S. Jónsson
Staðgengill forstöðumanns
framkvæmda- og eftirlitssviðs

Afrit: Skipulagsstofnun.